

Pɔl saba syāŋ wuhu kaplāŋ Korntifa ye

Syaha fla

¹ Ndoos Pɔl kē, ma suhu wo Yesu kāndeyārwe Timuti ne, too saba nwo yrūhū nɔ wāā. Ndoos Pɔl kē, le tāy Yāhā ye ke n ta ta Yesu Crise tēnlɛɛ. Wo u saba yrūhū nɔ wāā yii Yesu kāndeyārfa yawāhāfa kē Kornti wo, ma suhu yii mpāy bya ne, tee ma Yāhā wām ke Yakayi kāntraha kur bye wo. ² Wo Tuhufua Yāhā tesē wo Yīŋfua Yesu Crise ne, ke ke laantār yar ye na tesē ke yrīŋ ne.

Yāhā Pɔl flaŋ u wāfāy wo

³ -Too wo Yīŋfua Yesu Crise Tuhufa miingbāŋ gboho, Tuhufua wii kacān wee u laantār na ye, woo kē Yāhā ne, Yāhā gii ke nawee flaŋ yalebye. ⁴ Wāfāy gii syi ter ma sya wo dye, ke wo flaŋ. Koo syi kē, mpāy bye pe ma wāfāy wo, wo bya ga waha pe flaŋ wii ndoŋ wāflaŋ gii syi ter ne Yāhā ke wo flaŋ. ⁵ Ye sē yāā, le ma mii wo dyaŋ u Yāhā Yīndefua Crise ne. Wāfāy tii te u dye ter, te syar. Wāfāy busāā ga ba wo dye ke syi dyaŋ. U -sē wo flaŋ koo syi dyaŋ. ⁶ Wo ma nii n fāy, wo n ke yii poo na, ye wāflaŋ yāā, wāsyayaha ne, koo kē. Wo ma -sē wāflaŋ yāā, ye bya ga wāflaŋ yāā, ke n ye ta, per gaa ye n waha naa wo wāfāy ter syi fāy laanyīn ne. ⁷ Loo ne, wo koho taha yaha

ye wĩ na fānga ne. Wo cā ma yee, tee wo wāfāy ter syi yāā, ye ga ba wo wāflaŋ ter syi yāā.

⁸ Wo nna, ye sē yāā, wāfāy tii bye te wo dye Yasyi kántraha kui wo, wo n traha ye te cā. Te wāfāy ba gboho ter wo na. Wũsaha ge sē pye wo na ye. Wo sē ba cā ge cā waa kuee yrāŋ na nantāŋ ye. ⁹ Wo n sya ba yee pe ba wo wāboo wĩ pāā ta. Koo wāfāy nge -sē wo ta wo n cā ma yee, wo sē yai wo koho taha yaha wii na, mii Yāhā ya sē kē ye, koo gii ke nakur ta te n yir gbā wo, ma n nii yrāŋ na. ¹⁰ Koo kē, ke wo sya yaha gbā koho wo; ke ga wo sya naa n yaha koo syi. Áwā, wo koho taha yaha ke na, ma cā ke ga wo sya naa n yaha koo syi. ¹¹ Wo maha cā, yii ge ga koho le wo ye Yāhā wānar ne. Nawee- busāā ma nii Yāhā nar wo kē ke syi, ke ga luhu pe ye, ke loo kayĩ pye wo kē, nawee- busāā n syaha wāā ke kē wo wĩ na.

Nwa Pɔl sē yāā dur ga Kɔrnti wo ye?

¹² Lii le ma wo ye yĩnkuāyir wĩ, loo ne nde: Wo laam wo, wo le cā laha ma yee, driyēfa nsoho wo, tesē ye bya nsoho wo, wo naa wo troho tāhā Yāhā cĩnde yor wo, ma maha naa wii ta prafa mii Yāhā le yar mii. Wo sē waha yia koo troho wātāhā ter nge na nawee laam kacān syi kāmāy na ye, Yāhā laantār kāmāy ne. ¹³ Yii ge le cā ma yee, kaplāŋ nkāy too yrūhũ nɔ n wāā ye kē, ke yĩntaha ma gbegbe, ke wee sī ye. ¹⁴ Tee ke yĩntaha war cacar yagaa, ta laam wo ye ga ba ke war tāŋ. Koo kē nge ne: Yīŋfua Yesu durbaper, wo wĩ ga ba nii ye ye yĩnkuāyir wĩ, tesē ye wĩ bya ga ba nii wo ye yĩnkuāyir wĩ.

¹⁵ Loo nde gboho ra laam wo, ta n sya ba yee, n ga cãã ka ye fla na, wo n wii yãã, wo maha ba wii yãã taha tehe syāṅ gaa na, le n nii ye ye kayĩ laa. ¹⁶ Ye sē yãã, n ba naa n yee, ndoo ga cãã ka ye fla na, n cã ta ter ga Maseduan kãntraha na, n ma ga dur, n maha ba yi ye fla na, ye n koho le ra ye ra yrãhã wãyi na Yude kãntraha kue ye. ¹⁷ Tē ba loo nde le yaha ra laam wo, laa na yii mpāy le ga ma yee, tē sē ba le ta kai ye? Ye yee la, n laam ga naweete wāṅ syi dyaṅ, n naa yē klaha, n waha naa n yee «ãwã», tē maha naa n yee «aye» le yalebya wo? ¹⁸ Yãhã gii ke sron, n ga waha le pãã ke yĩnde na n yee: Kapãn lii too ba ye yar, wo sē yee «ãwã» ma maha wã klaha ma wo yē klaha le yalebya wo ye. ¹⁹ Ye sē yãã, ndoo, Silaasyi ne, Timuti ne, Yãhã Dya Yesu Crise wii, wo u wĩ pãã ye ye, u sē pa u n pai nii u naa n yee «ãwã » tuu dur naa yē klaha le yalebya wo ye. Yesu wĩ le yar, Yãhã sē dur n yi le kapãn kur ye ye. ²⁰ Ye cã u wãpaṅ wo ta wo n cã, Yãhã ke bii yē ter kayũhũ nkãy wãwãã ne wo kē, waa ke bye yãã. Yesu wĩ wo ta wo n cã, Yãhã sē yēklahaṅ cã ye. Loo ne, too ne yee le nii ke syi Yesu Crise myaha na, Yãhã miingbãṅ kē too n gboho loo nde ne. ²¹ Wii tesē ye ne, wo seefar le Yesu Crise ne, Yãhã ge kē ke wo ta wo n waha wii plãhã wo Yesu wãtaṅ ne wo Yater. Koo kē ke wo yãṅ yi. ²² Ke ke myaha puhu gbãã wo na, ma Yãhã Yrã le wo laam wo, loo n ta wo n cã waa ba ke kayũhũ yãã, kayũhũ nkãy ke ke ta yaha wo kē.

²³ Ya'a yãã n sē dur ga ye fla na ke Kornti wo ye, n sē naa n traha n wãfãy ta ye na ta kaplãṅ

ne ye, koo kē. Yāhā yīnde ma ra na, le ma pye kawar, ke ra ta ra n ku. ²⁴ Wo cā ye Yesu sronṅ ta ye Yater; le sē nii mii wo n ke wo ye le le wo fānga na ye. Ye nii nuhu ne, loo ne too n ke ye ne.

2

¹ Loo ne ta n yee, n saa maha ka ye fla na n ga maha wāfāy gaa taha ye na ta kaplāṅ ne ye. ² Ye sē yāā, n ma wāfāy ta ye na ke syi, yoo ga ba nuhu le ta laam wo? ³ Loo ne, ta n ba saba waa yrūhū nō wāā ye kē, ma yee n sē naa n traha n ka ye fla na ye n wāfāy yāā, le n nii ra bya ye wāfāy ye. Ye cā ye wīi ne, le ga waha nuhu le ra laam wo. N maha cā ma yee, nuhu ma pye ra laam wo, le ga nii nuhu wīi ye bye ye. ⁴ U faale saba wāyrūhū wīi nii ra ye wāfāy wīi laa, ma suhu laam wlāhā wīi, tesē yīntām wāyi wīi. N sē yee le nii ye ye wāfāy ye, n n traha ye cā, ye ntāṅ dye gboho ra tāy kacān wee ye, koo kē ra n ba u faale saba yrūhū nō wāā ye kē.

Ye naa n tyii kapee- foho na!

⁵ Ye laam wo, waa ma pye u laa tee pye, le n nii laam wāwlāhā wīi, ye cā ndoo laam sē me ufua wlāhā ye. Yii mpāy laam me u wlāhā, le ma sya pye ye bye sē me ye. ⁶ Yii busāā ma -sē u pēn wa, le yai u ne ke dyaṅ. ⁷ Yagaa, ye -sē yai ye tyii u kapee- fue na, ye nuhu le u laam wo; mii loo sē ne ye, woo gē laam ga waha wlāhā ter u ye, le sya kacān bye kua u na. ⁸ Loo ne, n ga ye nar nde ne: -Ye u yigi yō u n cā u yee, u ntāṅ dye ye tāy. ⁹ Ya'a yāā, n ba u faale saba yrūhū nō wāā ye kē, n maha naa n traha n yāṅ, ye ma pye ye n luhu

ra kaklaha ye yalebye. ¹⁰ Waa ma laa tee pye, ye n tyii u kapee- fue na, ndoo bya ga tyii ufua kapee- fue na. Ta wīi ma pye laa ne kapee- foho wātyii wīi laa na, n ma tyii koo kapee- foho na, n le pye yii wīi na u Yāhā Yīndefua Crise yīnde na. ¹¹ Wa'a yee, wo sē tyii ufua kapee- fue na koo syi ye, sāndāpee yīnfua Setane ga waha fānga yāā wo na, woo wii wo u laam wūhū cā yō.

Pɔl ka Toosa na

¹² Tē ga dye Toosa wo, ma yee ndoo ga le Crise kapāyīi pāā ke fla na, Yīnfua Yāhā ba ke fla draha cāā gbihi ta wa ra yaha ye. ¹³ Tē -sē ga dye ke fla na, n sē wo Yesu kāndeyārwe Tyite yāā ye, ta ntāṅ n nii ra cer busāā. Loo n ta, ra n ba kānde nar Toosafa ye, ma ter Maseduan kāntraha na.

Wo ga waha yia kai- bye na u Crise kāmāy na

¹⁴ Yāhā miingbāṅ yai ke naa n gboho, koo gii ke wo ta wo n yia kai- bye na u Yāhā Yīndefua Crise kāmāy na. Ke wo ta wo Crise wīi pāā nawee- ye teebehe bye wo mii lasekole dyaṅ too n yār teebehe bye wo. ¹⁵ Ye sē yāā, Yāhā ye, wo ma Crise lasekole dugu dyaṅ mpāy nsoho wo pe wāsyayaha yāā wa, tesē mpāy ne pe plaha kāmpee- wāyār wo. ¹⁶ Mpāy pe plaha kāmpee- wāyār wo, koo lasekole dugu nge ma gbāku dugu ne, ke n pai gbā ne. Mpāy pe wāsyayaha yāā wa, koo dugu nge ma cīinde yrā dugu ne, ke cīinde yrā wāā nawee kē. Yoo syi ga waha yia tēn nde na? ¹⁷ Ye sē yāā, wo wee mpāy dyaṅ pe le Yesu kapāyīi wā klaha, ma le ta wake wīi ye. Yāhā kē ke wo lehe wāā. U Crise tēntē- me wo ne, wo yē kaplāṅ sroṅ Yāhā yīnde na.

3

Te naambiyārfān tēntē-

¹ Wo ma n pã ke syi, le sē nii mii wo wii sey ye. Wo sē maha n ke mpāy dyaŋ, wo saba yar ye na, wii syi u wo sey ye. Wo sē maha woo syi saba ke, ye u gbihi wã wo kē ye. ² Yii me, tee ma woo syi saba wo ye, saba wii syi u yrūhū yaha wo laam wo. Nawee- bye ga waha le yāŋ cã, pe naa le kal ye troho wātāhā na saba ge dyaŋ. ³ Āwã, ye wī ma mii saba dyaŋ u Yāhā Yīndefua Crise le yar wo na, wo n le yrūhū yar nawee- na. U sē yrūhū cīnde sabakāi ne ntēmbapai na ye. U yrūhū Yāhā Yrã ne nawee- laam wo.

⁴ Wo ma n pã ke syi, wo koho taha yaha Yāhā na Crise kāmāy na, koo kē. ⁵ Wo -sē cã wo saha yee, wo ga waha yia yã tēn nde syi na wii ya kāmāy na ye. Wo ma waha yia lii na, Yāhā kē. ⁶ Ye sē yã, koo kē ke wo ta, wo n waha nii ke naambiyārfān tēntē-, loo ma Yāhā Yrã wī. Kānde lii le ta, le tēn kalaa wee ke naambiyārfān wī na ye. Loo kānde nde lii le yrūhū yaha, le nawee- yar pe yai gbã ne pe kapee- wāpye wī na. Yāhā Yrã loo -sē cīnde yrã wã nawee kē.

⁷ Le Yāhā kānde katan bye bii yrūhū yaha ntēmbapai na wii Yiifee- faale wādyaha Musa kē. Tuu naa ke yar nawee- na, le yalebya wo Yāhā nayōr n yehe Musa yīntaha na, pe Yīisrefa sē waha u yāŋ ge yāŋ ye. Ke wāyehē palpal nge sē -sē ma- ye. Kānde lii le ta, loo lii le tēn n gaha nawee ne gbã kue ye, nayōr ge ma le na. ⁸ Loo na, ye yai ye cã ye yee, Yāhā Yrã tēn nayōr ga gboho, kacān saa pye ye. ⁹ Tēn lii le naa n gaha nawee

ne gbā kue ye, nayōr te -sē pye le na, ye yai ye cā ye yee, tēn lii le nawee ta u n sron Yāhā yīnde na, loo nayōr ga gboho faale wān na, kacān saa pye ye. ¹⁰ Loo na, wo ma ke yagaa naambiyārfān nayōr wāyehē palpal nge wāgboho yāŋ, waa cā ke faale cāā naambiyār nayōr wee ngaa ge ye. ¹¹ Ye sē yāā, kai lii le n ma- carle ya, le nayōr ma yehē ke syi, ye yai ye cā ye yee, kai lii wākuayāā wee le na ye, kacān saa pye loo nayōr wāyehē wāgboho na ye.

¹² Wo koho taha yaha loo nde na, koo kē wo n waha le Yesu kapāyī wūhū pāā n yigi nawee-ye laanyīn ne. ¹³ Wo wee Musa wāŋ syi dyaŋ ye, woo wii u bii u yīntaha tā tā fai ne, pe Yiisrefa ma syi pe u yīntaha wāyehē palpal wākuan yāā, ke n kua ye. ¹⁴ Pe Yiisrefa bya pye mii fai paha tā pe kacān na, pe sē waha Yāhā wūhū war ye. Ma sya ba waa ke yagaa na, Yiisrefa ma nii ke faale Yāhā sabangbāŋ kaplāŋ kal, le ga nii mii fai paha tā pe kacān na, pe saha naa ke kaplāŋ yīntaha war ye*. Mboo wii ma -sē wāā le u Yāhā Yīndefua Crise ne, loo fai nde ga gbe kāā ma kacān na, ma n waha naa ke Yāhā wūhū war. ¹⁵ Ke nanga nge na, pe Yiisrefa ma nii Musa saba kaplāŋ kal, le ga nii mii fai paha tā pe kacān na, pe saha naa ke kaplāŋ yīntaha war ye. ¹⁶ Wii ma -sē u ya le soho Yīnfua koho wo, loo fai nde gbe kāā u kacān na. ¹⁷ Ma'a luhu Yīnfua, Yāhā Yrā ne. Yāhā Yrā ma tēn tē nawee wii laam wo, u wee fānga gaa

* **3:14** 3.14 Yiisrefa Musa kānde saba cā tesē pe faale Yāhā kaplāŋ tōrfa saba ne. Ma sya ba waa yagaa na, pe sē -sē le sya ma yee, Yesu Crise kē u Yāhā Yīndefua ne ye.

ter koho wo nantāṅ ye. ¹⁸ Fai laa wee le tã tã wii yĩntar na ye. Yĩṅfua nayōr n yeḥe wo bye yĩntar na palpal. Loo na, wo wã n klaha ma ga naa n nii Yĩṅfua wāṅ syi, kaa n naa n taha wo nayōr na. Ye sē yāã, Yāhã Yrã tēn ne loo ne.

4

Tēntēle wii u sroṅ

¹ Yāhã loo tēn nde le soho wo koho wo ke laantār na, loo ne wo wii plāhã le wo. ² Fyar wūhū nkāy ke n pye wam wo, wo koo wīi sye. Wo sē nawee- wāwlaṅ kacān ter ke ye, wo sē le Yāhã kapān wã n klaha ye, wo le cīinde loo yar n laha nawee- na. Too wo troho tãhã gbaa na ke syi Yāhã yĩnde na, mpāy pe sroṅ, poo ge ga waha naa wo sey loo nde na. ³ Le Yesu kapāyīi nde lii too n yar nawee- na, mpāy pe plaha kāmpee-wo, pe saha le wīi war ye. ⁴ Ya'a yāã, pe sē le Yesu kapāyīi wūhū sya cīinde ye, driyē nge yĩṅfuapee pe laam kacān wlāhã pe ye, koo kē. Woo yĩṅfuapee nwo sye pe na, pe saha le kapāyīi cāāngbāṅ yāã ye, le kapāyīi lii le Crise miingbāṅ wīi pāã, woo wii u ma Yāhã ke ya kai na. ⁵ Wii wīi sē ne too n pāã ye, Yĩṅfua Yesu Crise wīi ne too n pāã. Wo yee wo ma ye tēntē-, ma ga naa le Yesu kapāyīi wūhū tōr ye ye. ⁶ Ye sē yāã, Yāhã bii yee: «Cāã- pe naa yeḥe wam laam wo!» Koo kē, ke n ke cāã- ta pe n yeḥe wo laam wo, ma wo ta wo n cāã- yāã ke miingbāṅ wācāṅ na, ke miingbāṅ gii ke n yeḥe Yesu Crise yĩntaha na.

Wāfāy tii te Yāhã tēntē- dye

⁷ Wo le Yesu kapāyī wūhū cā, le kacān cāā-n nii wo laam wo. Wo ma mii poor gbāhā dyaŋ wangbāy kla ne ke laam wo. Loo nde le yar gbaa na ma yee, fāngangbāŋ nge gii ke syi wee yāā ye, Yāhā wāŋ kē, wii wāŋ sē kē ye. ⁸ Wāfāy ter bye wo dye, ke sē -sē waha wo boo ye. Ntāncer ma wo na, loo naa bye ne, wo koho taha yaha Yāhā na. ⁹ Pe wo nuhu le Yesu kapāyī wī na, Yāhā sē -sē koho kuā wo na ye. Pe wo gbā cāār yaha kāntraha na, wo sē -sē ku ye. ¹⁰ Wo kadye crā gbā ne mii Yesu Crise dyaŋ tuu gbā yāā mii. Wo kadye ma -sē nii yrāŋ na, Yesu Crise cīnde yrā ter ne le ma wo ye. ¹¹ Too ma yrāŋ na, gbā wo ke yalebye Yesu wī na. Koo ga ta Yesu Crise cīnde yrā ter n waha naa n yāā wo kadye na, koo gii ke ga waha gbā yāā. ¹² Loo nde na, wo tyii gbā wo ke, ma yee cīnde yrā le naa yii ke, cīnde yrā lii wākuayāā wee le na ye.

¹³ Yāhā sabangbāŋ wo, wo wādyaha gii ke Yāhā wāsey yay saba yrūhū, ke le yrūhū ta teelaa wo ma yee, woo Yāhā ta u Yater, loo ne woo n pāā ke ye ma ke sey. Wo bya, wo Yāhā ta wo Yater, loo ne wo ke wī pāā. Wo Yāhā ta wo Yater kānkai-bye wo, wo wāle wāŋ syi. ¹⁴ Ye sē yāā, wo cā ma yee, Yāhā wo Yīŋfua Yesu ta u n yir gbā wo, ma dur ba yrāŋ na gbaafa ye. Ke ga ba wo bya ta ye ne, wo n yir gbā wo, wo nii yrāŋ na Yesu ne, ke maha wo ta wo n nii ye ne Yesu yaha ye. ¹⁵ Kai- ngī bye n pye yii wī na. Te Yāhā laantār wāā nawee- busāā kē, ma yee pe nawee- fānga pe naa n pāā Yāhā ye, pe naa syaha wāā ke kē, pe naa ke miingbāŋ gboho.

Kayĩ lii too ga ba yãã

¹⁶ Loo ne, wo sē fāy n sya ye. Wo kadye sraha ma sya pye n klaha- cacar, wo laam poo na, pe fānga yãã plii wuhu na. ¹⁷ Wāfāy gii ke wo dye, ke ma car ya, ke sē maha n ma- ye. Koo wāfāy nge n pai wo kē kayĩ lii syi ne wākuayãã wee le na ye, kacān sē maha wee le wāgboho na ye. Le wĩ sē n tān gē tān ke wāfāy wĩ ne ye. ¹⁸ Ye sē yãã, kai- nkāy ke n yãã yĩnde ne, wo sē koo yāṅ ye; nkāy ke sē n yãã yĩnde ne ye, koo roo n ke. Kai- nkāy ke n yãã yĩnde ne, koo n ma- carle ya, nkāy ke sē n yãã yĩnde ne ye, wākuayãã wee koo na ye.

5

¹ Ye sē yãã, wo cā ma yee, driyē nge wo, wo ma kadye sraha gii laam wo, ke ma mii nwonge dyaṅ too dye nii. Wo ma ba ku, koo kadye sraha n pye klaha-, Yāhā ga ba yāhāyĩṅ nwoṅ gaa wãã wo kē yāhāyĩṅ na. Wāklahayãã wee koo na ye. Yāhā gē kē ke koo nwoṅ nge gbihi, nawee sē kē ye. ² Too ma teelii wo yagaa, wo n sī cīinde wāsī, ma n ke wo pye wo yāhāyĩṅ nwoṅ nge wo. ³ Ye sē yãã, wo yāhāyĩṅ nwoṅ nge, koo gii ke ma wo kadyefāṅ, ke ma ba gbihi wa, kadye saa maha ba ke laa yãã wo ye ye. ⁴ Āwā, too ma wo kāntraha nwonge nge wo, wo n sī wāsī ya woo, mii tegengbān dyaṅ te ma wo yĩṅ na. Le sē nii mii wo n ke wo wo kāntraha kadye miy yaha ye. Wo yee, wa'a ba ke yāhāyĩṅ kadye le, loo le ga tāy wo ye. Loo na, kla gii ke ga waha ku, koo ga draha yaha kla gii kē ke ma cīinde yrā ne, lii wākuayãã wee le na ye. ⁵ Yāhā gē kē ke wo ta, wo ba koo wāwāklaha

nge syi wā klaha. Ke ke Yrā wāã wo kē, ma yee le wo ta wo n cã, waa ba ke kayũhũ yãã, kayũhũ nkāy Yāhã ke ta yaha wo kē yāhãyiŋ na.

⁶ Loo ne wo sē fāy n sya ye. Wo cã ma yee, too ma kadye sraha nge wo, wo fla dey Yīnfua fla ne. ⁷ Ye sē yãã, too sē kla gii yãã yīnde ne ye, wo koo ta wo Yater ma n yār. ⁸ Wo sē fāy n sya kueekuee ye. Wo ma ne ga waha kadye sraha nge yaha, wo ga nii kuee Yīnfua tãy, loo le ne ga tãy wo ye. ⁹ Le tãy wo ma kadye sraha nge wo woo, wo wee ke wo ye woo, lii too cãã n kē kai-bye yaha ye, loo ne wo wĩ le tãy Yīnfua ye. ¹⁰ Ye sē yãã, u Yāhã Yīndefua Crise ga ba wo bye sãhã, u wo nanem bye dããn wãã wo kē kayũhũ nkāy wĩ na, tesē kapee- nkāy wĩ ne, too pye cãã gii cãã na wo pye wo kãntraha kadye sraha wo.

Yesu Crise wo wãã le Yāhã ne

¹¹ Wo n fya Yīnfua na, kacãn wee ye. Loo ne, wo n traha nawee- bye pe Yāhã wũhũ cã pe ke sya cĩinde. Yāhã wo cã. Too ma mii, ye bye le cã ye laam wo. ¹² Myaha sē kē too n kē ye ye ye, wo n kē wo wĩ le nii ye ye yĩnkuãyir wĩ. Loo na, mpãy pe kalaa wee laanyõm na ye, ma pe ya sey gbaa wũhũ koo ne, tee ga pe yē wãã naa n sya lii ne, yaa cã. ¹³ Le ma pye cĩinde, wo yīŋ wee ye, Yāhã ya wĩ ne le ne. Le ma -sē pye wo yĩntar ma gbegbe, le nii ye ye yĩnkuãyir wĩ. ¹⁴ Ye sē yãã, wo ntāŋ pe dye gboho Yesu tãy, loo ya le tãy ter wo ye, ma wo ta wo n nii woo ya tēn tē. Wo le cã laha ma yee nawee nen ya ku nawee- bye wĩ na; le nii mii nawee- bye u gbã ter syi ku. ¹⁵ U ku nawee- kur bye wĩ na. Loo na, mpãy bye pe

ma yrāṅ na, pe wee yrāṅ na pe ya kānkai- wīi na nantāṅ ye, pe ma yrāṅ na Yesu ya kānkai- wīi na, woo wii u ku, ma dur ba yrāṅ na poo wīi na.

¹⁶ Loo nde ta, driyēfa pe nawee yāṅ u kadye sraha na mii syi dyaṅ, wii sē nawee yāṅ koo syi ye. Faale wo, wo ma sya pye wo naa u Yāhā Yīndefua Crise yāṅ driyēfa wāyāṅ u kadye sraha na, yagaa wo sē u yāṅ ke syi nantāṅ ye. ¹⁷ Nawee woo ma kāhā seefar le wa Crise ne, u nii nafuē waa Yāhā yīnde na. U faale kānkai- kua u yīṅ na; u kānkai- bye nii tāṅ kafūhū fla. ¹⁸ Yāhā kē ke koo ngīi bye ta. Koo kē ke wo wāā le ke ya ne Crise kāmāy na, ma wo taha wo naa nawee- ta pe ba wāā naa n le ke ne. ¹⁹ Ye sē yāā, Yesu Crise kāmāy na, Yāhā tēn tē, ma ga nawee- bye wāā le ke ya ne, ke pe kapee- gbe kāā pe yīṅ na. Ke wo taha, wo koo wāwāāle tēn nde wīi pāā nawee- bye ye.

²⁰ Wo kapān gbe Crise woo myaha ne; le nii Yāhā gē kē ke pāā n wāā ye ye wii yē ne: Wo le nar n waha ye ye Yesu Crise myaha na, ye tyii ye wāā le Yāhā ne! ²¹ Kapee laa sē pye Yesu Crise yīṅ na ye. Yāhā -sē wo kapee- bye taha woo yīṅ na, ma yee woo nen ya kāmāy na, wo sronṅ ke yīnde na.

6

¹ Le nii ke syi, wii mpāy too ma le Yāhā tēn na, waa ye yar waha nde ne: Yāhā laantār wīi lii wāā ye kē, ye ma syi le n yi wāwaha ye. ² Yii gē le cā ma yee, le ma le yrūhū yaha Yāhā sabangbāṅ wo ma yee, Yāhā yee:

«Yaliile le ba yai n' luhu ma wānar ye,

loo yale le ba nɔ,
 n luhu ma wānar ye.
 Per gii ke ba yō n' ma sya yaha,
 koo per ke ba nɔ, n ma sya yaha.»
 Ke Yāhā wānar yaleyī -sē kē yagaa. Ke
 wāsyayaha peryūhū -sē kē nanga.

Yāhā tēntēle wii u ke tēn ya kar

³ Lii too n κε, laa wāpee ma syi le yāā le Yāhā tēn kuε ye ye. Loo ne, kai lii syi le sē sron ye, wo sē n traha wo le syi laa pye waa na ye. ⁴ Kānkai-byε wo, wo le yar Yāhā tēntē- me wo ne: Wo wii plāhā laanyīn ne wāfāy ter byε wo tesē laam wāwlāhā ter byε wo tesē ntāncer ter byε wo. ⁵ Ye sē yāā, pe wo gbā, pe wo tā nwompihi wo, pe klofa ta pe n wāhā cer wo ne; tēṅ nkāy ke waha, wo sē fya ke wātē ne ye. Wo naa wāy fāā sya Yesu tēn wīī na, wo naa wo yē tā digi na. ⁶ Wo kapyen ter le yar Yāhā tēntē- me wo ne, tesē wo kacān ter ne, wo laanyīn ne, wo laantār ne, tesē le Yāhā Yrā ne le tēn lii tē wo laam wo, tesē wo Yesu kāndeyārwei ntāṅ wādye wīī ne wo tāy, ⁷ tesē wo Yesu kapāyīī wāpāā ter ne nawee- ye, ma suhu Yāhā fānga ne. Ya'a yāā wo yia kai- ngīī byε na, Yāhā ke wo ta wo n sron, loo ne le n paha wo na; loo maha ne, le ma wo naanmiy kla.

⁸ Mpāy' wo sey, mpāy -sē' wo tyεε. Mpāy' wo miyūhū yee, mpāy -sē' wo miipihi yee. Mpāy' wo tōr kawarfuafa ne, wo -sē' cīinde pāā. ⁹ Pe' wo yāṅ mii pe sē wo cā ye, pe byε -sē' wo cā tāṅ. Pe n yee too ku; wo -sē mii yrāṅ na, nawee- byε yīinde ma wo na. Pe' wo yāṅ mii wāpēn gaa ter dyaṅ ke wo dye; wo sē -sē ku le wo ye. ¹⁰ Mpāy

ma pe n ke wo laam n naa n war; wo laam -sē ma nuhu fla yalebye. Pe' wo yāŋ nawām, wo -sē' kayūhū wāā nawee- busāā kē. Pe wo yāŋ mii ngaa wee wo ye ye, kayūhū bye -sē ma wo ye.

¹¹ Korntifa, yii mpāy ye ma wo naambiyām, nkāy ke pye wo laam wo, koo kē too pāā ye ye, wo sē laa wūhū ye na ye. Ye wīī laanfīr yigi wo kē. ¹² Wii laha ye ye, yii me tee sē laha wo ye ye.

¹³ Loo ne, n ga ye yar mii ta pii ge dyaŋ ye ne: Ye ntāŋ pe dye wo tāy mii, ye tyii wo ntāŋ n dye ye tāy koo syi, -tee tyii wo wīī n laanfīr yigi ye kē.

-Ye yii yigi mpāy ne pe wee Yesu kānde wo ye!

¹⁴ Mpāy pe wee Yesu kānde wo ye, ye ma syi ye naa n gbra pe ne kai- wo ye. Ye sē yāā, kai lii le sron, le saha wāā le lii ne le pee ye; tesē kai lii le ma cāā- wīī, le saha wāā le lii ne le ma wam wīī ye. ¹⁵ Ye cā u Yāhā Yīndefua Crise saha wāā le sāndāpee yīŋfua Setane ne ye; loo na, wii u Yesu Crise ta u Yater, u saha wāā le wii ne u wee Yesu kānde wo ye. ¹⁶ Yāhā kangbāŋ ma suhu mpar wān ne, te dey te ya ne. -Ye yāŋ, Yāhā gii ke ma yrāŋ na, koo kangbāŋ kē wo ne. Yāhā ge bii loo pāā ma yee:

«N ga ba pye pe nsoho wo,
n naa n yār pe ne.

N ga nii Yāhā pe ye,
pe n -sē nii ra nna.»

¹⁷ Loo ne Yīŋfua Yāhā n maha bii yee:

«-Ye yii cer yi kāā pe nsoho wo!

Ngii ke wee gbegbe ye,
ye ma n te ke na ye,
n -sē ga ye gbihi yigi.

18 N ga nii Tuhufua ye ye,
 ye n -sē nii ra dyam tesē ra pueesyam ne.»
 Yīŋfua Yāhā kapān ne, koo gii ke ma tāŋ kai- bye
 fānga ne.

7

1 Ta naambiyām, Yāhā yē ter kayūhū ngī
 wāpyeŋ ne wo kē. Loo na, wo yai wo wo kadye
 yee yi naa n kãã, wo laam ne kai- nkāy wo ke
 wee gbegbe ye, -too naa n fya Yāhā na, loo na
 waa laha kai- bye wo, wo nii cīnde Yāhā nawee-

Lii le Pɔl laam flege

2 Ye tyii wo wī n laanfir yigi ye kē! Wo sē
 kapee pye waa na ye, wo sē waa koho kla pye
 klaha- u kē ye, wo sē fufor pye waa na ye. 3 Le
 sē nii mii ye wī laa sē yō, koo ra n pāã ke syi ye.
 Yii gε le cā, n ba le pāã wa ye ye ma yee, ye wī
 gboho wo laam wo, le tāy wo ma yrāŋ woo, wo
 ku woo, ngaa saha wo cāãŋ wii na ye ne ye. 4 N
 sē cεr ye na ye, ye wī ma ra ye yīnkuāyir wī.
 Wo wāfāy bye wo, ye wī ra flaŋ ma maha nuhu
 le ra laam wo. 5 Ye sē yāã, too ga dye Maseduan
 kāntraha wo, wo sē wūūsaha yāã ye, wo wāfāy
 ter bye yāã: Nawee- wāfāy ta wo na, wo maha
 naa ntāŋ cεr. 6 Yāhā gii ke -sē wāfāyfa flaŋ, ke
 wo flaŋ Tyite wāpaŋ ne, 7 tesē u yē kaplāŋ ne:
 Tee u laam yīn kaplāŋ nkāy ne, ma fānga le u
 laam wo, u ke pāã ra ye. Ta wāyāã laam ke ye
 yigi mii, ye laam pe wlāhā ye ye ra wī na, tesē
 ye n kε ye dye ra kue ye mii, u koo tōr ra ye. U
 kaplāŋ bye nuhu le gboho ra laam wo.

⁸ Saba wii tē ba yrūhū nɔ wāã ye kē, ke kaplāŋ ma sya pye, ke ba ye laam wlāhā, yagaa u saba wāyrūhū wīl tǎy ra ye. Ke kaplāŋ ke ba ye laam wlāhā yaliile wo, le ba ra fāy loo yale wo. ⁹ Nanga nge na, le nii ra ye nuhu wīl, n sē yee ye laam wāwlāhā wīl ye. Tee waha cā, ma koho klaha, ma le kānyīl gbe ye laam wāwlāhā flāhā tǎy, loo ne le tǎy ra ye. Ya'a yāã ye laam pe wlāhā ye ye, Yāhā wīl ne. Koo fla na, wo sē laa tee pye ye na cīnde ye. ¹⁰ Ye sē yāã, laam wāwlāhā Yāhā kānde na, le n pai kānyīl wāgben ne, kānyīl lii le n gaha nawee ne u wāsyayaha kue ye. Loo yō. Driyēfa laam wāwlāhā ter, loo nde n pai gbā ne. ¹¹ Yāhā ke ye laam wāwlāhā ta, ma tēn lii tē ye laam wo, ye sē le tēn fla yāã la? Kai lii le pye ye fla na, ye sē na, ye le ta kangbāy? Ye sē na, ye n ke ye le yar, nawee- n cā ye wīl wee laa ne loo kai nde wo ye? Le sē na, le fyar yigi ye kē? Ye sē na, ye n fya Yāhā na? Ye sē na, ye n ke ye ra yāã farfar? Ye sē na, tee fānga yāã? Ye sē na, ye n ke ye loo kai nde pyefua pēn? Yagaa, ye le yar laha ke syi ma yee, ye wīl wee laa ne kai nde wo ye.

¹² Ya'a yāã, tē ba u saba yrūhū nɔ wāã ye kē, n sē ba u yrūhū u kapeepyefua wīl na ye. Le kapee le pye wii na, n sē maha ba u yrūhū woo wīl na ye. N naa n ke, ye bye ye le cā Yāhā yīnde na ye yee, wo wīl gboho ye laam wo. ¹³ Loo ne, le wo flaŋ. Ye bye tee Tyite laam yīn u kē, u n nii nuhu ne, loo nde maha nuhu le gboho wo laam wo, ma sya ta ter. ¹⁴ N ba faa nii sey ye wīl na Tyite yīnde na. Ye -sē ga ta, le n nii mii tē ba naa nii sey u yīnde na mii. Too cīnde ya pāã ye ye

yalebye, loo ne too ba ye wĩ sey Tyite ye mii, u ga le yãã koo syi. ¹⁵ Yalebye u u laam too ye wĩ na; tee naa n luhu u kaplāŋ ye, tee ba u gbihi yigi ma naa nagboho tii syi ta u na busãã, koo ngĩ kaa taha ye ntāŋ wādyen na u tāy. ¹⁶ Tē cã n ga waha koho taha yaha ye na kai- bye wo, loo nde ra laam yĩ nuhu ne.

8

War wāwāã Yesu kāndeyārfa fenfa kē

¹ Wo nna, Yāhā kayĩ lii le pye Maseduan kāntraha wo, pe Yesu kāndeyārfa yawār teebehe wo, wo n traha ye le cã. ² Wāfāy tii bye te pe Yesu kāndeyārfa dye, loo naa bye ne, nuhu ba gboho pe laam wo, pe n sya laantār wĩ laa pye gboho, pe sē pe nawān ge yāŋ ye. ³ Ta n cĩinde nde pãã ye ye, pe ga waha ngii kē, pe pe laam flege, ma koo kē pe ya ya ma sya ta ter. ⁴ Poo -sē me, pe ba wo nar waha, too tyii poo ngaa nō wãã Yesu kāndeyārfa mpāy kē pe ma Yude kāntraha wo, pe pe koho soho*. Pe yee, loo nde ga nii pe ye nuhu wĩ. ⁵ Too ba kla gii syi wĩ ga yigi pe ne, pe kē ma ter koo yaha. Pe -sē ba cãã pe ya le soho Yīŋfua koho wo. Loo kur ye, Yāhā n maha pe ta pe n pe ya le soho wo bya koho wo.

⁶ Loo ne, wo n Tyite nar, u ka ye fla na. U ba koho wāyi tēn lii koho yigi, u ga ta ter le ne, u ye ta, ye n loo laantār wĩ nde pye kua. ⁷ -Ye yāŋ, kayūhū bye ma ye ye: Ye Yesu ta ye Yater, ye le Yesu kapāyĩ wūhū pãã cã, ma maha ke wāwar

* **8:4** 8.4 Koo cãã na, fāāngbāŋ pye Judee kāntraha na.

cā, ye sē maha wāfāy gε cā le tēn wo ye; wo ntāṅ maha dye ye tāy. Kayī wīl nen lii ya le -sē kuee ye na, waa ye yar le ne: -Ye laantār wīl nde pye kua! ⁸ Le sē nii mii fānga wīl laa ne tē yee ye pye ye. N ma mpāy laantār wīl tōr ye ye, n n traha ye yāṅ, le ma pye ye Yesu kāndeyārwai ntāṅ sron dye ye tāy cīinde. ⁹ Yii gε wo Yīnfua Yesu Crise laantār ter cā: Woo wii tuu pye cīinde nangbān wān byε ne, u u ya ta nawūū draha wo yii wīl na, ma yee ye waha kayūhū yāā woo nawān flāhā tāy. ¹⁰ Ta n ta laam wīl pāā ye ye: Tēn lii ye le koho yigi dyalaa na, le yō; -ye ta ter le ne! Yii me tee cāā yir le wāpyeṅ ne; yii me le maha cāā tāy ye laam wo. ¹¹ -Ye ta ter yagaa, ye le tēn pye kua! Tee ba ye laam gbihi ta mii syi ma le koho yigi, -ye ye laam gbihi ta koo syi, ye le pye kua ngii ne, tee ga waha yia ye kē. ¹² Ye sē yāā, mboo wii ma koho yi nuhu ne, loo ne le n tāy Yāhā ye, ma'a sya yee ma sē waha yia, ma kē gboho ye.

¹³ Pe sē yee, ye ye koho kla byε kē tāṅ ye mpāy yi pe fεn wo, yii tee too ye. Ye byε, ye nii wācεṅ, le yai le nii koo syi. ¹⁴ Yagaa, ye sē na, kla ma ye ye? Loo na, ye ga waha koho le mpāy ye, ngaa wee pe ye kueekuee ye, ye pe yi kāā fεn wo. Per gaa, ye bya ma -sē ba pye wāfāy na, kla n yāā poo ye, pe bya ga waha koho le ye ye, pe ye yi kāā fεn wo. Ye ma nii koho le yii ye ke syi, yaa yii yi naa n kāā fεn wo, ye naa n nii wācεṅ. ¹⁵ Loo ne le yrūhū Yāhā sabangbāṅ wo ma yee:

«Wii tuu ba yāā, ma gbe dege,
 ngaa sē kuee ma ba fūhū u ye ye.
 Wii tuu sē ba yāā gboho ye,

ma gbe carle ya,
ngaa sē -sē naa n waha u na ye.»

Tyite u tēntēwai ne

¹⁶ Yāhā miingbāŋ yai ke naa n sey, koo gii ke Tyite ta ye wīi n gboho u laam wo wo wāŋ syi dyaŋ. ¹⁷ Too Tyite nar lii ne, u le sya nuhu ne, ma sya le pāā ta woo ga ka ye fla na. ¹⁸ Wo Yesu kāndeyārwai nwo, wii Yesu kāndeyārfa yawārfa bye u tēyīi wīi pāā le Yesu kapāyīi wāpāā ne, waa woo ta u n ka Tyite ne. ¹⁹ Woo maha kē, pe yāŋ yi u ke yrāhā yi wo ne, wo n ga ke kohole kla wāā, kaa n taha Yīŋfua miingbāŋ na, tesē le n waha cā wo laantār gboho.

²⁰ Wo n traha, waa ma n ba wāpee laa yāā wo na le wangbāy nde kue ye pe le soho wo koho wo ye. ²¹ Lii le yō, wo sē n ke wo loo pye Yīŋfua ya yīnde na ye, wo maha n ke wo loo pye nawee- bye yīnde na. ²² Waa maha wo Yesu kāndeyārwai waa le taha poo nawee- syām mii na. Wo u pye yāŋ tēŋ busāā ne, u n ke tē yō nuhu ne. Yagaa, tuu yee woo cā, yaa ye tēn pye kua, loo u nuhu wāgboho wīi yar.

²³ Yagaa, le nii mii, Tyite woo nii wo tēntēwai too lehe wāā ye ye. Pe Yesu kāndeyārwai syām mii na, pe yawārfa me pe poo lehe wāā; pe tēn tē u Yāhā Yīndefua Crise miingbāŋ wīi na. ²⁴ -Ye le yar pe na tesē pe Yesu kāndeyārfa yawārfa ne, pe n le yāā pe ntāŋ dye ye tāy, pe n maha cā wo tāhā kē too wii sey ye wīi na.

9

¹ War mpāy syi pe yai pe ka Yude kântraha wo koho wāle wīi na ke fla Yāhā nawee- ye, n ma sya yee, n sē pe wīi pāā ye ye ye, laa wee le na ye. ² N cā, ye ye laam gbihi ta loo na, ta n sya nii sey ye wīi na Maseduan kântrahafa ye. Ye sē yāā, n pe pye ma yee, yii Yakayi kântraha kuifa, ye yii gbihi ta wa dyalaa na, le yale syi ma na. Ye laantār wīi nde n -sē laantār le gboho poo busāā laam wo. ³ N ga Yesu kândeyārfa nawee- tāā mii lēhē wāā ye fla na, too ye sey lii na, le ma n yi wāwaha ye, ye n yii gbihi ta cīinde, mii n ba le pāā mii. ⁴ Mii loo sē ne ye, Maseduan kântrahafa ma ba pa, wo n ka ye fla na ma ga yāā, ye sē yii gbihi ta wa ye, le ga fyar sron yigi wo kē, too ba ye wīi sya ter cīinde. Yii fyar -sē ga waha pye la wātōr wīi? ⁵ Loo ne, ta n Yesu kândeyārwai mii nar pe cāā ka ye fla na ra yaha ye, pe ga koho le ye ye, ye n ye laantār kohole kla gbihi ta, koo gii ye yē ter ke wīi ne. Loo na, n ma ba ka, n n gaha yāā ke gbihi ta wa; loo ga ta le n cā ye ke kē yay ne, ke wākē wīi sē ye yaa ye.

Laantār wūhū

⁶ Yii γε le cā laha ma yee: Wii ma digi tāhā car ya, ufua ga ba gbe car ya. Wii ma digi tāhā busāā, woofua u ga ba yāā gbe busāā. ⁷ Loo ne, ye nanem bye yai ye kē ye laam wākē, le ma syi le waa yaa ye, le ma syi le nii waa ye fānga wīi ye; ye sē yāā, wii u n kē nuhu ne, woofua wīi ne le n tāy Yāhā ye. ⁸ Yāhā ga waha ye kē kayūhū ter bye ne busāā, ke n yai ye ye, te gber n sya kuee ye ye, ye n waha naa kayūhū busāā pye te

ne. ⁹ Le yrūhū Yāhā sabangbāņ wo loo wīl na ma yee:

«U u koho wān kē n gboho laantār ne.

U nawūū kē.

U kasroņ wāpyeņ saa kua yāā ye.»

¹⁰ Yāhā kē ke yēy wāā yēy tāhāfua kē, u yē digi ne. Yēy giī wīl ke -sē ma ye na, ke ga koo wāā ye kē, ke ke ta ke n fiy, ke le, ke pii sa, tesē ke ta kaa naa n taha ye kasroņ na. ¹¹ Yāhā ma -sē yii ta ye n nii yai klafa ke syi, ye ga waha naa laantār wūhū pye nawee- busāā kē yalebye. Loo ga ta, pe n syaha wāā Yāhā kē pe naa ke miingbāņ gboho. ¹² Ye sē yāā, ye kayīl nde, le ga pe Yude Yesu kāndeyārfa wīl yō, loo ya sē -sē ne ye; le ga maha ta syaha busāā n kē Yāhā ye, ke miingbāņ n naa n sey. ¹³ Ye kayīl nde ga ye ter yar nawee- na gbaa na. Le ga maha ta, nawee- busāā n Yāhā miingbāņ sey yii wīl na, tee Yesu Crise sroņ ta ye Yater, ma maha n luhu le Yesu Crise kapāyīl wūhū ye, mii ye le pāā nawee- ye mii. Tee kayūhū pye ye koho wān ne laantār ne, pe Yude Yesu kāndeyārfa kē ma suhu nawee- bye ne mii, pe ga maha Yāhā miingbāņ sey loo nde wīl na. ¹⁴ Le ga nii kayīngbāy Yāhā pye ye kē. Loo nde ga ta ye ntāņ n dye gboho pe tāy, pe ga naa Yāhā nar ye kē, pe maha naa syaha wāā ke kē ye wīl na. ¹⁵ Yāhā miingbāņ, ke naa n sey ke kayīl wīl na wo kē, ke kayīl lii kacān wee yāā le wāyōņ na le wāgboho ne ye.

10

Pol u tēn wāstroņ wīl pāā

¹ Pe n yee, ndoo Pɔl ma pye ye nsoho wo, ta laam ga naa n tãy, n ma yee n wee ye nsoho wo ye, n ga ra laam waha ye ne. Loo ne, n ga wĩ nen laa pãã ye ye: N ga yii nar nde ne u Yãhã Yĩndefua Crise laanyĩn ter ne, u laantãr ter ne:

² Ye ma syi ye ra ta, ra n ba naa fãnga wũhũ pye ye na, n ma ba pa ye fla na ye. Mpãy pe n yee, wo n pye naweete- wãpyeṅ, n cã n ga waha ra laam waha poo ne, kacãn ɣε saa pye ye.

³ Wo cã ma yee, nawee- me wo ne; too -sẽ ma tẽn lii wo, le wee mii naweete naan dyaṅ too n miy ye. ⁴ Wii, wo naanmiy wãn wee driyẽfa wãn ne wãceṅ ye: Yãhã wãn ne wii ye, te ma fãngangbãṅ ne, ma ga waha yia fãnga wãn ter byε na. ⁵ Koo kẽ ke wo ta, wo n waha n yia kawar wũhũ na. Wo n yia yataṅ wũhũ nkãy na, ke yer n tã nawee na u Yãhã wãcãṅ na. Wo n ke nawee- pe naa n luhu u Yãhã Yĩndefua Crise woo ye pe kãnkai- byε wo. ⁶ Yii poo ma luhu n wa Crise wũhũ ye, mpãy pe yee poo sē n luhu ke ye ye, wo wii gbihĩ ta wa pe wãpẽn na.

⁷ Ye ma, ye ma kai yãã yĩnde ya ne mii syi, ye ne le ta koo syi. Loo nde ya na, wii ma cã u ma Crise wũũ, u maha le cã u yee, wo bya ma Crise wãm u wãṅ syi. ⁸ Ye sē yãã, Crise fãnga wãã ra kẽ ye yawãhã wãgbihita wĩ na, ke wãklaha- wĩ sē ne ye. N ma sya pye, n nii sey koo fãnga nge wĩ na, loo saha nii ra ye fyar wĩ laa ye. ⁹ N sē n traha n naa ye ta, ye n naa n fya ta saba mpãy ne tẽ yrũhũ nɔ n wãã ye kẽ ye. ¹⁰ Ye sē yãã, pe n pãã ma yee: «Pɔl saba kaplãṅ n dege, u laam maha waha n ter ke wo; le ma -sẽ nii mii woo ɣε

kadye kē u ma wo nsoho wo, u ma ter muuu, u yē kaplāŋ sē maha wee ngaa ge ye.» ¹¹ Mpāy pe nde syi pāā, pe le cā pe yee, wo ma dey ye na, kaplāŋ nkāy too n yrūhū wo saba wo, koo tesē nkāy ne too ga ba naa n pye, wo maa pye ye fla na, ke bye wāceŋ.

¹² Ye cā ma yee, wo saa wii tān mpāy ne pe pe ya sey ye. Poo pe ya yāŋ, ma pe ya tān kla gii ne poo ya pe le cā; le nii mii pe pe ya tān pe ya ne, wāklāŋ kē pe klāŋ. ¹³ Wii na, wo saa wii sey ta ter yīŋ gii na wo ma ye. Yāhā ke wo ta yīŋ gii na, ma sya ta wo n ka ye fla na, waa wii sey yer too yīnfar nde draha wo. ¹⁴ Ye sē yāā, Yāhā kē ke ta, wii n cāā ka le Crise kapāyī ne ye fla na. Wii ma sya u ya ta yīŋ gii na ye fla na, wo wī sē nii mii, wo wii ta ter wo draha fla na mii mpāy ter dyaŋ ye. Poo sē me pe cāā pa le kapāyī ne ye fla na ye, ma -sē pe ya ta too yīnfar nde draha wo, ma sya ta ter. ¹⁵ Wii sē wii sey waa ter tēn ne ye, tēn lī le wee wo wī ye. Kaa ma n taha ye Yesu wātaŋ na ye Yater, Yāhā ma sya, le Yāhā tēn ga ka yahasee ye ye fla na, wii koho tēn laam wo. ¹⁶ Loo ga ta, le Yesu kapāyī ga naa n pāā ye kue kānkāy kui bye wo; wii sē wii sey waa tēn na ye.

¹⁷ Le -sē ma le yrūhū yaha Yāhā sabangbāŋ wo ma yee:

«Waa sē yai u naa u ya sey ye,
u yai u naa Yīnfua Yāhā koo sey.»

¹⁸ Ye sē yāā, wii u u ya sey u ya ya, woo sē kē u ma myaha ne ye. Yīnfua u wii sey, woo kē u ma myaha ne.

11

Pe kawar Yāhā tēntē- wĩ

¹ Ta kaplāŋ ma sya nii mii yĩŋ wee ke na ye, ye -sē yii plāhā, ye ye laam yĩn ye naa ke luhu ra ye. ² -Ye yāŋ, Yāhā ta ra yeysyar n gboho ye wĩ kue ye, koo kē. Ye sē yāā, ye ma ra ye mii capua dyaŋ, tē yigi tāāndya u Yāhā Yīndefua Crise kē u sya cɔɔ, capua wii syi u sē naa cā yāā ye. Le yĩntaha kē, u Crise woo nen ya ntāŋ me pe yai pe dye ye tāy. ³ Tee Yesu ta ye Yater laantee nen ne, n ntāŋ cɛr, pe ma n ba ye wlaŋ yi kāā u kur ye mii Awa wāŋ syi dyaŋ ye, ke nwoho ke ba u wlaŋ ke kaplāntāhā ne. ⁴ Ye sē yāā, waa ma pa, ma ba Yesu waa ter wĩ pāā ye ye, Yesu wii syi u wee wo wũ ye, yaa le sya. Waa ma yee u ga kapān laa ter le ye laam wo Yāhā Yrā wĩ na, kapān lii le wee wācɛŋ lii ne too le ye laam wo ye, yaa maha yer le na. Waa ma kapāyĩ laa ter wĩ pāā ye ye, lii le wee Yāhā kapāyĩ lii too yar ye na ye, yaa maha loo bya sya.

⁵ Mpāy pe pe ya ta poo ma Yāhā tēntēyōm, ye n luhu pe ye, n sē le sya pe ter ra yaha laa ne ye.

⁶ Le ga waha pye, kaplāŋ sīsĩ wāpāā ra yia, n sē yee kacān ye. Ye loo yāā wo na yalebyɛ, kānkai-byɛ wo.

⁷ Tē ba le Yesu kapāyĩ pāā ye ye, n le pāā ye ye ke dyaŋ, n sē ngaa sya ye ye le na ye. Tē le sya, ma nii tege tāā ye ke syi, ma nagboho ta ye na, a ye yee la, n tee pye loo ne? ⁸ N yer le na, ma dāān sya Yesu kāndeyārfa yawār teebɛɛ nkāy ye. Le nii mii, n poo koho wān sya pe ye, ma ba tēn tē ye kē Yesu kapāyĩ wāpāā ne. ⁹ Tē pye ye

fla na, war wĩi naa n pye ra na, n sē -sē teger ta yāā waa yīṅ na ye. Yesu kāndeyārwai mpāy pe ba yir Maseduan na, ma pa ra fla na, pe ba ra kē wān bye ne, tii wĩi te pye ra na. N sē ba nii ta teger ye ye kai laa wo ye. N ga naa n nii koo syi ye ye. ¹⁰ Crise cĩinde lii le ma ra laam wo, loo kāmāy ne. Loo nde nii ra ye yĩṅkuāyir wĩi Yakayi kāntraha kui bye wo, waa saha loo sya ra ye ye. ¹¹ N ma kaplāṅ ngĩi pāā, le sē nii mii ye ntāṅ sē dye ra tāy ye; Yāhā gē le cā ye ntāṅ dye ra tāy. ¹² N ga naa n pye koo syi, n saa naa teger ta ye yīṅ na ye. Loo na, mpāy pe n kē pe naa pe ya tān wo ne, a poo n tē wo dyaṅ, pe saa pāāsaha yāā ye.

¹³ Poo mii, kawar Yāhā tēnlēhe me pe ne, pe sē n sron pe tēn wo ye, ma pe ya ta nawee- yĩnde na, poo ma Yesu Crise tēnlēhe. ¹⁴ Nde sē yai le nawee fe gbe ye; sāndāpee yīṅfua Setane gē sē ne u ya ta la cāā- yāhāyīṅ tēnlēhe dyaṅ u ne? ¹⁵ U tēntē- bya ma pe ya ta kasron tēntē-, loo wee kafuē ye. Pe dye yer tēn lii wo, pe ga ba pe tēn wāpēn draha yāā.

Pɔl wāfāy, le Yāhā tēn wo

¹⁶ N ga maha ye yar, waa ma syi u ra yāṅ mii ra yīṅ wee ye. Ye ma -sē yee, ra yīṅ wee ye, ye -sē tyii ra n faa nii sey ye ye car. ¹⁷ N cā, nkāy tē n pāā yagaa, Yīṅfua kaplāṅ sē kē koo ne ye; le sya nii ra ye fāṅga wĩi, n nii sey, n ma -sē le pye, ta kaplāṅ ma mii wii kaplāṅ dyaṅ u yīṅ wee ye. ¹⁸ Mpāy ma pe pe ya sey driyēfa wāsey; ndoo bya ga nii sey nii ndoṅ. ¹⁹ Yii mpāy tee ma kacāṅ-, mpāy pe yīṅ wee ye, pe wĩi sē sye ye ye laa gē ne

ye. ²⁰ Pe ma ye yigi yāmpa dyaṅ ye ne, le sē sye ye ye ye. Pe ye koho kla sya ye ye fufor na woo, pe kawar fua ye ye woo, pe ye yāṅ nafla draha wo woo, pe ye fey yīntaha na woo, laa γε sē sye ye ye ye. ²¹ Le nii mii ndoo sē naa fānga yāā ma naa koo kapee- ngĩ pye ye na ye. Le wāpāā γε fyar yigi ra kē.

Nawee tuu ga ser kai- nkāy pye, ta bya ga waha ser koo pye. N kapān nde pāā mii ra yīṅ wee ye. ²² Pe ma yee poo ma Yeberēfa, Yeberēfa naa kē ra bya ne. Pe ma yee poo ma Yiisrēfa, ta bya ma Yiisrēfa naa. Pe ma yee Brama kur kuε pii me poo ne, Brama kur waa kē ra bya ne. ²³ Pe ma yee u Yāhā Yīndefua Crise tēntē- me poo ne, ndoo γε ga nii sey mii ra yīṅ wee ye. N ga le yar n yee, ndoo ma Crise tēntēle, ma ter pe yaha: Tēṅ kuε ye, n ter pe yaha. Gbār kuε ye, n gbār sya ma ter pe yaha le Yesu Crise tēn wī na. Wātā wāṅ syi nwompihi wo, pe ndoo tā nwompihi wo ma ter poo yaha le Yesu Crise tēn wī na. Gbā kuε syi ye, n pye gbā tāy tūntūn ma ter poo yaha. ²⁴ Tēhe bua Yiifēe- ra gbā yāā sāngblāyīhī gbebblee sesānsyihi kuaresānsyar ne. ²⁵ Tēhe tāā Wormefa ra gbā yāā kāi ne, tēhe nen pe ra waa yāā ntīhī ne. Tēhe tāā, salangbāṅ yoho pye klaha- loho wo wo ne, kaa γε na ra n sya per wihi pye loho laam wo. ²⁶ Ta yrāhā busāā wo, tēhe buar lafey lafir ra pey yāā, yuhu- naboofa maha ra pey yāā. Ta terfa ra pey yāā. Mpāy pe sē cīinde Yāhā cā ye, pe ra pey yāā. N wāpey yāā kungbāy wo, n wāpey yāā drawar wo tēyāfūū klo wo, n wāpey yāā muhulangbāṅ wo. N maha

wāpey yāā kawar Yesu kāndeyārfa nsoho wo. ²⁷ Tēṅ nkāy ke waha, n koo tē yāā; kawlanṅ ta dye yāā; tēhe busāā n sē wāy yāā sā wāy ye; fāā ra pey yāā loho fāā ne; tēhe busāā, n ta yē tā digi na; kalen wān wāyōr sē pye ra ye ye, ta n naa n fāy wer koho wo. ²⁸ Ke bye saha tōr tāṅ ye. Plii bye, n n fāy laangar koho wo, ma yee pe Yesu kāndeyārfa yawār tebehe ngīi bye ga pye mii ke gbihi ta, ke naa yīṅ yāā. ²⁹ Wii ma pye fen wo, le ga naa ra bya fāy. Wii ma kapee plaha pye, le ga naa ra yaa fānga ne.

³⁰ N ma yai n nii sey, n ga nii sey ta wāfāy wīi na. ³¹ Yāhā gii ke ma wo Yīṅfua Yesu Tuhufua, ke myaha yai ke naa n sey yalebye. Koo ge cā, n sē kawar fua ye. ³² Cāā gii cāā na n pye klo nde wo pe n yee Damasu, fāngafua Yaretase kāntraha kai- yahaseefua ba u seraasyi ta pe ra yigi. Le klo bye le ba fāā gbey le klaha tā ncahajruhu ne, pe seraasyi ba yer tā te kapahayēr bye na. ³³ Le klo wo, nwoṅ gaa ba fāā mar ke ncaha na, fenaater ne pe yi wāā ke ncaha ne. Pe n ta yi koo fenaater ne, ma ra yoṅ tege wāā nkur ye takuē ne pe namii pua le na, ta n wloho yi.

12

Yāhā fāngangbāṅ wāgblihilaafa ye

¹ N yai n nii sey, le ma sya pye le sē yō ye. N -sē ga laa pāā ye ye Yesu kāndeyārfua waa wīi na, ndoo ge u cā. Yīṅfua u ta, u n kai- nkāy yāā wāytāā wo, kai- nkāy ke wūhū. ² Ke dye- sēnsye resyar kē yagaa, u ba kuā yir ga ta yāhāyīṅ na Yāhā tāy. N cā woo ge u kuā yir ga ta cīinde laa,

n cã u u ya yãã wãytãã wo ke fla na laa, Yãhã ya le cĩnde cã. ³ ãwã, n le cã laha ma yee, u ba kuã yir ga ta Yãhã niisayũhũ fla wo. N cã woo ge u pye ke fla na cĩnde laa, n cã u u ya yãã wãytãã wo ke fla na laa, Yãhã ya le cĩnde cã. ⁴ Koo fla na, u kai- nkãy luhu, kai- nkãy u saha ke pãã ye. Ke syi sã yai ke yi naweete yẽ wo ye, koo kã. ⁵ Woosyifua wĩ na, wii Yãhã ke ke ya yar u na, n ga waha nii sey. Mii loo sã ne ye, n saha nii sey laa ne mii ta wãgblihilaa wĩ loo ya sã ne ye. ⁶ N ma ne yee n ga nii sey koo ngĩ bye wĩ na, tã ba yãã wãytãã wo, ta kaplãṅ ga ne pye cĩnde, le saa ne nii mii ra yĩṅ wee ye. N sã -sã ga nii sey ye. Ye sã yãã, nawee- pe ra yãã, ma ra kaplãṅ luhu ma -sã ra ta draha gii wo, n sã n traha pe ra ta ter koo fla yaha ye, koo kã.

⁷ Koo kai- ngĩ ke ba yar wa ra na wãytãã wo ke syi, n ne ga waha naa nii sey ke ne. Yãhã -sã laa ta ra na, lii le ra ta n saha yataṅ ta nii na koo kai- ngĩ wĩ na ye. Le ma mii ngaa sãn dyaṅ le ra kã ta kadye wo. Le n nii n pye mii Setane sãndũpee waa dyaṅ u ra gbã. ⁸ N Yĩṅfua nar yãã teḥe tãã u koo wãfãṅ nge dey kãã ra na. ⁹ U n ta pye ma yee: «Ta laantãr roo ya re yai ma ne. Ma sã yãã, ta fãngangbãṅ tẽn tẽ gbaa na ma wãgblihilaa flãhã tãṅ.» Le nii ke syi, n ga naa nii sey ta wãgblihilaa wĩ na tesẽ ta wãfãṅ wĩ ne. Ye sã yãã, u Yãhã Yĩndefua Crise fãngangbãṅ tẽn tẽ ra wãgblihilaa flãhã tãṅ. ¹⁰ Loo ne Crise wĩ ma ta ra n gblihi laa, tesẽ pe ma nii ra tyehẽ u wĩ na, n ma nii fen yãã u wĩ na, pe ma nii ra nuhu u wĩ na, pe ma nii ra laam wlãhã u wĩ na, n koo

ngĩ bye sya nuhu ne. N cã n ma gblihi laa loo yale ne, n ne pye fānga ne Yesu kāmāy na.

Pol ntāṅ cēr Korntifa wĩ na

¹¹ Yii me tee ra ta, ra n nii n pãã mii ra yĩṅ wee ye. Yii -sē me tee yai ye naa ra sey. N ma sya yee n wee ngaa ye, ye cã n sē kloṅ laa ne pe Yesu tēnlēḥe mii na ye, poo mpāy pe pe ya ta kacān wee poo na ye. ¹² Kai- nkāy ke le yar n ma Yesu tēnlēḥe, koo kai- ngĩ bye pye yar ye na gbaa na. N naa laanyĩn yãã kānkai- bye wo, n Yāhã laanwo wũhũ pye yar ye na, yēkã wũhũ ne, ma suhu kayar wũhũ ne. ¹³ N ye Yesu kāndeyārfa yawāhāfa tee yigi la laa ne, ma tyii pe Yesu kāndeyārfa yawārfa nde bye na? Lii ya le ma, n sē ye koho kla gaa nar sya yãã ye ye ye. Ye ga waha yee le sē tãy ye ye ye. Ye tyii ra n ye nar, ye kace yaha ra na loo na.

¹⁴ Le nde, ta tēḥe tãã wuhu kē yagaa, tē ga ka ye fla na. N sē -sē n gaha nii ta teger ye ye ye. Ye sē yãã, ye koho wān sē ne tē n kē ye, yii gē me tē n kē. Ye le cã ma yee, kicar sē me pe yai pe wale kē naa n ta pe seefa kē ye. Pe seefa poo me, pe yai pe naa loo nde pye pe kē. ¹⁵ Loo ne, le ga tãy ndoo ye, n ta koho wān bye yi ye wĩ na, tesē n nii ta yāmpuai ye wĩ na, ye n waha naa n gaha yaha ye le Yesu kānde wo. Kaa ma n taha ye ntāṅ wādyen na ra tãy, loo la le ga ta, ra wĩ saa naa n tãy ye ye nantāṅ ye?

¹⁶ Ye le sya ma yee, n sē ba nii ta teger ye ye ye; waa -sē ga waha yee, a ndoo kacān taa ter yãã, ma ye wlanṅ kawar raa ne. ¹⁷ Tē mpāy lēḥe wãã ye ye, ye yãã la n pe ta, pe n ngaa sya ye ye ra

kē? ¹⁸ N Tyite ta u n ka ye fla na, woo tesē u Yesu kändeyārwei nwo ne. Tyite ba ngaa sya la ye ye ma ta woo wāŋ? Woo tesē ndoo ne, wo känkai-wee la wāceŋ, wo troho wātāhā ne?

¹⁹ Laa na, ye ma, ye le ga wo sē sron ye ye ye, koo kē wo n nii kaplāmbuar ngī bye pāā ma ga tāhā sya. Aye, le wee ke syi ye. U Yāhā Yīndefua Crise laam kaplāŋ kē, too n pāā ye ye Yāhā yīnde na. Ye ntāŋ dye gboho wo tāy koo kē, wo kai- ngī bye pāā ye ye ma yee, ke ye ta kaa n taha ye Yesu wātaŋ na ye Yater. ²⁰ N ma ba ka ye fla na, n n traha n ga ye yāā mii syi tesē ye n traha ye ba ra yāā mii syi, n ntāŋ ceŋ, le ma n ba nii koo ye. N ntāŋ ceŋ, n ma n ga ye yāā wāhā na, laanyar ne, ncafühū ne, sānker ne, yii wātyehē ne, yii wāgblaha ne, yataŋ ne, wāwlāhāpye ne ye. ²¹ N ma ba ka ye yāŋsaha wo, n ntāŋ ceŋ, Yāhā ma n ga ta ye wī n fyar yigi ra kē ye. N maha ntāŋ ceŋ, laa na, n n gaha ye yāā, ye laam wo, mpāy pe naa kapee- pye, pe sē le sya ke wāpyeŋ sē yō ma ke miy yaha ye; loo nde ga ba ra ta miiwūn na. Koo kapee- kē, tyatyāhā wāpyeŋ ne, cayor ne, tesē fyaryigi wūhū nkāy ne.

13

Kur kuε kaplāŋ

¹ Ta tēhē tāā wuhu kē yagaa, tē ga ka ye fla na. Ye yai ye cā, kawlāhā nkāy ke pye tē, ke yai ke war yi, ke gbihi ta nawee- syām yīnde na, laa na nawee- tāā syi, mii le ma le yrūhū yaha Yāhā sabangbāŋ wo mii. ² Mpāy pe ba kapee- pye faale wo, kayar wī laa ma tē ga pe yar, poo ma suhu ye

bye ne. Tē pye ye fla na ke tɛhe syāŋ wuhu na, n ba ye yar wa le ne, loo ne nde: Yagaa tē ga ka ye fla na, mpāy pe sē naa n sron ye, n sē n gaha tyii pe na mii pe sē pe kapee- wāpyeŋ wāpēn draha yāā ye. ³ Ye yee ye n ke ye le cā laha ye yee, u Yāhā Yīndefua Crise woo ge kaplāŋ kē ke n yi ra yē wo; yaa le yāā. Crise sē gblihi laa ye wāpēn na ye, wāke kē u n ke u fāngangbāŋ ke waha naa n yāā ye nsoho wo. ⁴ Āwā, le nii mii u kadye sē pye fānga ne ye, pe n u kuey mar boo trā na. Yāhā fāngangbāŋ kāmāy -sē na, u ma yrāŋ na. Wii mpāy too seefar le u ne, fānga wee wo bya na ye. Too -sē wo troho tāhā ye ne mii syi dyaŋ, ke le yar wo bya ma u ne yrāŋ na Yāhā fāngangbāŋ kāmāy na.

⁵ -Ye yii yāŋ yāŋ, le ma pye ye Yesu sron ta ye Yater ma ye troho tāhā u kānde wo cīinde. -Tee kai laa pye le n waha yāŋ cā ye na, ye Yesu ta ye Yater. Ye cā Yesu Crise ma ye nsoho wo; ye ma yee ye sē loo cā ye, ye fihī wee u kānde wo ye. ⁶ Ta laam wo, ye ga ba le yāŋ cā wii na ye yee, wii sron ma Yesu tēnlehe. ⁷ Wo Yāhā nar, ye ma n naa kapee- pye, wo n naa ye pēn, wo naa wo fānga yar ye na ye. Wo n ke wo naa ye yāā kayūhū ya wāpyeŋ koo na yalebye, wo ma n ye pēn yāā laa ge ne ye, le ma sya ga nii mii wāgblihila dyaŋ too gblihi laa ye wāpēn na. ⁸ Ye sē yāā, kai lii le sē n gaha Yāhā cīinde kue ye ye, loo wāpyeŋ fānga wee wo ye ye. Wo kānkai- bye n gaha le Yāhā cīinde kue koo ye. ⁹ Ye ma nii kayūhū koo ya pye, wo saha ye pēn laa na ye, le ma sya nii mii fānga ma ye na, wo n gblihi laa ye wāpēn

na, loo nde ma wo ye nuhu wĩ. Loo ge ne too n nar Yāhā ye, ye waha yǒ naa n gaha. ¹⁰ Tē sē ka wa ye fla na ye, ya'a yāā tē kaplāŋ ngĩ yrūhū nō wāā ye ye, n n traha, n ma ba ka ye fla na, n ma n ga naa ra laam waha ye ne ta fānga flāhā tāy ye, fānga gii Yīŋfua Yesu ke le soho ra koho wo. Koo kē ta n ye cāā yar kaplāŋ ngĩ ne. Koo fānga nge le soho ra koho wo Yesu kāndeyārfa wāgbihita wĩ na, pe sē yee pe wāklaha- wĩ ye.

Syaha fla

¹¹ Wo nna, ta kaplāŋ kua; -ye ta ter ye faale nuhu ne! -Ye ye troho gbihi naa n tāhā le Yesu kānde wo, -tee naa yii laam yīn le wo. -Ye naa n nii yīmbui nen na tesē yrīŋ ne yii ne. Loo na, Yāhā ga pye ye ne, koo gii nawee- ntāŋ dye ke tāy, ke maha yrīŋ wāā nawee- kē.

¹² -Ye naa syaha wāā yii kē, mii tuhufua nen pii wāŋ syi dyaŋ pe ntāŋ dye pe ya tāy. Pe Yāhā nawee- nanem bye pe syaha nō wāā ye ye.

¹³ Yīŋfua Yesu Crise u u kayĩ wāā ye bye kē. Yāhā ke ke laantār ter wāā ye kē. Yāhā Yrā le nii ye laam wo, ye n nii yīmbui nen na le ne.

YĀHĀ NAAMBIYĀRFĀN SABA
Karaboro, Eastern: YĀHĀ NAAMBIYĀRFĀN SABA
New Testament

copyright © 1993 Wycliffe Bible Translators, Inc.

Language: Eastern Karaboro

Contributor: WBT Central Zone

All rights reserved.

2020-11-17

PDF generated using Haiola and XeLaTeX on 22 Feb 2024 from source
files dated 29 Jan 2022

15120496-00e2-503a-8d40-2d7cfdc1ba5b